

**i** FLETUDHËZUES I PAKETIMIT:  
Informacion për përdoruesin

## ANABOFARMA

Tableta – 5 mg  
(Metandienon)

**Lexojeni me kujdes këtë fletudhëzues përpara se të filloni përdorimin e barit.**

- Ruajeni këtë fletudhëzues. Mund të keni nevojë ta lexoni përsëri.
- Në qoftë se keni pyetje të mëtejshme, pyesni mjekun ose farmacistin tuaj.
- Ky bar është përshkruar për ju. Mos e jepni tek persona të tjerë. Mund t'i dëmtojë ata edhe pse mund të kenë të njëjtat simptoma si ju.
- Në qoftë se ndonjë prej efekteve anësore përkeqësohet ose në qoftë se vëreni ndonjë efekt tjetër anësor, që nuk përmendet në këtë fletudhëzues, ju lutemi të njoftoni mjekun ose farmacistin tuaj.

**Në këtë fletudhëzues:**

1. Çfarë është Anabofarma dhe përse përdoret
2. Përpara se të merrni Anabofarma
3. Si ta merrni Anabofarma
4. Efekte anësore të mundshme
5. Si ta ruani Anabofarma
6. Informacion i mëtejshëm.

### 1. ÇFARË ËSHTË ANABOFARMA DHE PËRSE PËRDORET

Anabofarma përmban lëndën aktive metandienon (metandrostenolon). Ai ka veti anabolizuese, të cilat janë më të theksuara se efektet e tij androgjenike. Kjo përgatesë shton sintezën protidike, pengon largimin e kalciumit dhe të azotit nga veshkat dhe i kundërshton efektet e padëshirueshme katabolizuese penguese, të shkaktuara nga mjekimi me hormone adrenokortikale me veprim të zgjatur. Metandrostenoloni nxit formimin e lëndës themelore të kockave, kusht i domosdoshëm për shtimin e rezervave të kalciumit të skeletit. Efekti anabolizues shfaqet me shtimin e oreksit, me shtimin në peshë dhe përmirësimin e gjendjes së përgjithshme. Tabletat Anabofarma 5 mg gjejnë përdorim në sindromat dhe sëmundjet, ku nevojiten efekte anabolizuese e katabolizuese dhe një veprim rindërtues i përgjithshëm, si: konvaleshenca pas infeksioneve të rënda, pas operacioneve dhe lindjes; rënie e gjendjes së përgjithshme pas sëmundjeve infektive kronike; gjendje dobësie dhe këputjeje; peshë e pamjaftueshme; dobësi patologjike; kaheksi; hipertiroidizëm; osteoporozë; proces i dëmtimit të kockave; vonesë e konsolidimit të frakturave; miodistrofi; humbje proteinore nga veshkat, zorrët dhe lëkura (nefroza, sindroma të humbjes proteinore intestinale, djegie etj.); mjet ndihmës i disa masave terapeutike, si: kortikoterapia, mjekimi citotoksik, radioterapia. Është përdorur edhe në rregullimet e rritjes në foshnjat, fëmijët dhe të rinjtë.

### 2. PËRPARA SE TË MERRNI ANABOFARMA Mos merrni Anabofarma në qoftë se:

- jeni i mbindjeshëm (alergjik) ndaj metandienonit ose ndaj ndonjëres prej lëndëve ndihmëse të Anabofarma;
- vuni nga kanceri i prostatës;
- vuani nga kanceri i gjirit;
- keni hiperkalcemi (nivel i lartë i sasisë së kalciumit në gjak);
- keni hiperkalciuri (nivel i lartë i sasisë së kalciumit në urinë);
- keni probleme të rënda me mëlqinë ose me veshkat;
- jeni në periudhën e shtatzënisë;
- jeni në periudhën e ushqyerjes së fëmijës me gji. Anabofarma konsiderohet e pasigurtë në moshat pediatrike.

Në qoftë se mendoni se keni ndonjë nga gjendjet e përmendura më sipër, mos i merrni tabletat, shkoni dhe flisni fillimisht me mjekun tuaj dhe ndiqni këshillat e dhëna.

### Tregoni kujdes të veçantë me Anabofarma

Njoftoni mjekun tuaj para se të përdorni Anabofarma nëse:

- jeni alergjik ndaj barnave të tjera, veçanërisht në qoftë se janë në të njëjtën klasë barnash me Anabofarma.

Anabofarma duhet përdorur me kujdes në të sëmurët:

- me çrregullime kardiovaskulare;
- me dëmtim të funksionit të veshkave ose të mëlqisë;
- me epilepsi;
- me migrenë;
- me diabet ose gjendje të tjera të cilat mund të rëndohen nga mbajtja e mundshme e lëngjeve.

Marrja e barnave të tjera

Njoftoni mjekun ose farmacistin tuaj në qoftë se jeni duke marrë ose keni marrë së fundmi barna të tjera, edhe ato pa recetë. Informoni mjekun tuaj në qoftë se jeni duke marrë ndonjë prej këtyre barnave:

- antikoagulues kumarinikë dhe indandionikë;
  - oksifenbutazon, sepse metandienoni mund të rrisë përqëndrimet plazmatike të tij;
  - insulinë, sepse metandienoni mund të rrisë efektet e saj në uljen e nivelit të glukozës në gjak.
- Këto barna mund të ndikohen nga Anabofarma, ose mund të ndikojnë në mënyrën se si ajo vepron. Mund të keni nevojë të përdorni sasi të ndryshme të këtij bari ose të merrni barna të tjera. Mjeku ose farmacisti juaj do t'ju këshillojë.

### Marrja e Anabofarma me ushqim dhe pije

Nuk ka të dhëna që ky bar mund të ndërveprojë me ushqimin dhe pijet.

### Shtatzënia

Njoftoni mjekun ose farmacistin tuaj në qoftë se jeni shtatzënë ose po planifikoni të ngeleni shtatzënë. Si shumica e barnave të këtij lloji, Anabofarma nuk rekomandohet të përdoret gjatë shtatzënisë. Mjeku ose farmacisti do të diskutojnë mbi rreziqet dhe përfitimet e marrjes së saj gjatë shtatzënisë.

### Ushqyerja me gji

Njoftoni mjekun ose farmacistin tuaj në qoftë se ushqeni foshnjen me qumësht gjiri. Ky bar kalon në qumështin e gjirit. Mjeku ose farmacisti do të diskutojnë mbi rreziqet dhe përfitimet e marrjes së tij në qoftë se jeni duke ushqyer foshnjen me gji apo keni në plan ta bëni këtë.

### Drejtimi i automjetit dhe përdorimi i makinerive

Tregohuni të kujdesshëm gjatë drejtimit të automjetit ose përdorimit të makinerive derisa të shihni se si Anabofarma ndikon tek ju. Gjithsesi, nuk ka të dhëna që të tregojnë se Anabofarma pengon aftësitë për të drejtuar automjetin.

### Informacione të rëndësishme mbi disa nga lëndët ndihmëse të Anabofarma

Ky bar përmban laktozë. Nëse ju është thënë nga mjeku juaj që keni intolerancë nga disa sheqerna, kontaktoni mjekun tuaj përpara se të merrni këtë bar.

### 3. SI TA MERRNI ANABOFARMA

Gjithmonë merrini tabletat Anabofarma vetëm sipas këshillës së mjekut. Në qoftë se ndjeni që efektet e saj janë shumë të forta ose shumë të dobëta, flisni me mjekun ose farmacistin tuaj. Këshillohet që tabletat t'i merrni në të njëjtën orë çdo ditë.

Doza mesatare fillestare në të rriturit është 10 mg në ditë (5 mg, 2 herë në ditë). Doza mbajtëse zakonisht është 5 mg në ditë. Në sëmundjet e rënda mund të përdoren doza ditore më të larta, p.sh. 20 – 30 mg në ditë, në doza të ndara. Megjithatë, mjeku juaj mund t'ju këshillojë të merrni një dozë tjetër në varësi të gjendjes tuaj dhe reagimit ndaj barit.

Mjeku juaj mund t'ju kërkojë të merrni Anabofarma për një kohë më të gjatë. Pyesni mjekun tuaj për këshillë në qoftë se nuk jeni i sigurt për sa kohë duhet ta merrni.

Tabletat Anabofarma duhet të gëlltiten të plota me një gotë ujë.

### Në qoftë se keni marrë më shumë Anabofarma

Në qoftë se keni marrë më shumë Anabofarma se sasia që duhet të merrnit, ose në qoftë se fëmijët e kanë marrë gabimisht këtë bar, ju lutemi të kontaktoni mjekun tuaj, spitalin, ose të telefononi urgjencën për të marrë një mendim për rrezikun dhe këshillë për veprimet që duhet të ndërmerren.

### Në qoftë se harroni të merrni Anabofarma

Në qoftë se harroni një dozë, merrni dozën në vazhdim kur të jetë koha për marrjen e zakonshme të saj.

Mos merrni një dozë të dyfishtë për të plotësuar dozën e harruar.

Në qoftë se keni pyetje të mëtejshme mbi përdorimin e këtij produkti, pyesni mjekun ose farmacistin tuaj.

### 4. EFEKTE ANËSORE TË MUNDSHME

Të gjitha barnat mund të shkaktojnë efekte anësore. Ndonjëherë ato janë serioze, shumicën e herëve jo. Mos u alarmoni nga kjo listë e efekteve të mundshme anësore. Mund të mos ju shfaqet asnjë prej tyre.

Njoftoni mjekun tuaj në qoftë se ndonjë prej efekteve anësore të mëposhtme ju shqetëson:

- efekte të padëshirueshme në veprimtarinë e tij metabolizuese si: shtim i mbajtjes së azotit, shtim i mbajtjes së natriumit dhe ujit, edema;
- shtim i vaskularizimit të lëkurës;
- hiperkalçemi;
- dëmtim i tolerancës ndaj glukozës;
- shtim i rritjes së kockave dhe peshës skeletore;
- iktër dhe hepatit kolestatik;
- tumore hepatike;
- tek meshkujt, atrofi testikulare, oligo dhe azospermi, hipertrofi e prostatës, gjinekomasti, priapizëm; tek femrat, virilizim si: hirsutizëm, trashje e zërit, alopeci, çrregullime menstruale; në të dy sekset, modifikime të libidos, akne në moshën prepuberale, kockëzim i kërcit të rritjes, poliglobuli, hepatotoksicitet, çrregullime gastrointestinale.

Në qoftë se vëreni efekte anësore, që nuk janë të përmendura në këtë fletudhëzues, ju lutemi të njoftoni mjekun ose farmacistin tuaj.

### 5. SI TA RUANI ANABOFARMA

Mbajeni larg fëmijëve.

Mos e përdorni Anabofarma pas datës së skadimit, e cila është e shënuar në paketim.

Mos e ruani mbi 25°C.

### 6. INFORMACION I MËTEJSHËM

#### Çfarë përmban Anabofarma

**Lënda aktive** është metandienon (metandrostenolon).

Çdo tabletë përmban 5 mg metandienon.

**Lëndët ndihmëse** janë: amidon misri, laktozë monohidrat, xhelatinë, stearat magnezi.

#### Përmbytja e paketimit

Kuti me 30 tableta.

#### Mbajtësi i autorizimit të tregtimit dhe prodhuesi:

#### PROFARMA Sh.a.,

Rruga. "Skënder Vila",

Tiranë, Shqipëri.

Tel.: +355 4 23 89 602

**Ky fletudhëzues u rishikua për herë të fundit në Gusht 2023.**

SPECIFICATION



CROPING AREA 12 x 19 cm

**PAY ATTENTION**, all the layers are visible. If you have to print this document please check or uncheck the specific layers.